

■ COLUMNA

Fortuna, cletg e ventira per tuts

DA ANDREA L. RASSEL,
KREUZLINGEN

Enconuschais Vos Delma Kinney? El è gist stà en las medias perquai ch'el ha gudagnà duas giadas entaifer trais onns il premi principal d'ina lottaria enta Atlanta. Sco Kinney ha laschè savair saja el i en ina drogaria per cumprar medischina cunter la tuss, haja lura anc vesì in formular da lotto ed l'haja cumprà e gudagnà immediatamain passa in milliun dollars. Quai sto schon esser stoda bel, in mument has la tuss, l'auter mument sas quasi far giu il nas cun bancnotas da tschient!

La davosa giada che jau sun stà en ina drogaria hai jau era pensà che quai saja in di fitg fortunà per mai, perquai ch'i n'aveva nagina coda e perquai ch'ils labellos eran en vendita speziala.

Quai mussa cleramain ch'i dependa per



gronda part da las spetgas individualas sch'ins sa senta fortunà u betg. Jau ma sent fortunà sche jau vomtar mes medi per laschar far la controlla sco mintg'onn e quella cuzza pli curt che mias visitas tar il coiffeur mintg'auter mais.

Jau sun ventiraivel sche jau ves quests dis tut ils tetgs da las chasas cuvertas d'ina stresa serrain alva. Jau maneg che jau haja gi cletg sche mia dunna ha preparà in da ses tratgs sanadaivels, sche que past ma gusta tut-

tina ed jau poss sincerar a mia dunna ch'i saja fitg bun – senza dir manzegas. Jau crai d'avair gi cletg sche jau tschent en la televisiun ed jau ves ni Stefan Raab ni Roman Kilchsperger.

Jau sun ventiraivel sche jau taidlel musica cun mia feglia e sch'i dat ina giada ina chanzun che plasha a nus domadus. Jau ma sent ventiraivel sche jau enconusch l'assassin en il crimi che jau hai per mauns da leger gia avant ch'il cumissari sa tgi ch'è il culpant. Jau crai d'avair gi grond cletg sche jau sun charrà memia spert sin l'autostrada, ma il radar automatic para d'esser stà tschentà giu.

Tschel di ma ha dumandà mia dunna sche jau ma sentia fortunà. Jau hai respundi affirmativamain. Ella m'ha tramiss al kiosk per cumprar in «Millionenlos». Ussa lain guardar!